

Guangjisi Minzcu Bau

ganhhau: CN45-0036 B.2018 Nd.6 Ng.20 liggaeuq fouhswt nienz ndwenngux cocaet

广西民族报

(壮文版)

主办:广西区民语委

出版:广西民族报社

出版周期:逢星期三出版

出版期数:总第3329期

Vanzgyangh Yungh Lai Cungj Banh-fap Doicaenh Hwnj- guh Dieg Guhyiengh Sonhag Cuengh Gun Song Vah Saw

环江多措并举推进壮汉双语教学示范基地建设

Geij bi neix daeuj, Vanzgyangh Mauznanzcuz Swciyen gaenxmaenx haiguh Cuengh Gun song vah saw sonhag hozdung, yungh lai cungj banh-fap doicaenh hwnjguh dieg guhyiengh sonhag “Cuengh Gun song vah saw”, gungganq le buek vunzcaiz minzcuz vunznoix Cuengh Gun song vah saw cungj rox he, vih daezsang minzcuz suciz, gyalai minzcuz doxgiet, swnjcienz caeuq fatyiengz minzcuz vwnzva, coicaenh dieg comzyouq minzcuz vunznoix ginghci ndawbiengz hwnghat guh-ok gungyen.

It dwg daengxcungq son'gyauq, daezsang gij suijbingz lauxsae sonhag song vah saw. Hengzguh gij dajveh son-
gyauq daengxcungq, binaengz miz muzdiz, miz dajveh anbaiz lauxsae song vah saw camgya song vah saw yezvu son'gyauq, doenggyaq son'gyauq, lawhmoq gyauyuz gvanhnen, gajgwz sonhag vunqsik, daezsang sonhag

caetliengh.

Ngeih dwg dungjcouz gviveh, laeb ndei aen gihci sonhag song vah saw caeuq hwnjguh gihci. Hableix baijbouh dieg guhyiengh sonhag song vah saw, cingjhab gij rengz lauxsae song vah saw, gajndeix gij swhyenz sonhag, ciuq bi-ndwen caeuq daegdiemj vahgangj hagseng hailaeb dangzgoq song vah saw, gohyoz anbaiz dangz song vah saw. Laebguh song vah saw sonhag bingzgyaq gikcoi gihci, gujli lauxsae gajgwz sonhag vunqsik, gajndeix sonhag fuengfap, haifat dungxcaiz hagseng, daezsang gij naengzlig hagsib.

Sam dwg gyagiengz sonyinx, daezswng song vah saw caetliengh, youq yen gyauyenzsaz caeuq aen cungsim hagdangz dieg guenjieix boiq hawj song vah saw sonhag conhciz gyauyenzyenz, fucwz guenjieix ngoenznaengz sonhag song vah saw, yen minzyijgiz ganbu giemnyaemh guh gyauyenzyenz, bang

conhciz gyauyenzyenz cujciiz haiguh gyauyenz hozdung, haiguh goqdaez yenzgiu, doigvangq gyauyenz cingzgoj.

Seiq dwg ngaenzcienz baujcam, bangrengz hwnjguh dieg guhyiengh. Binaengz, yen caizcwngh bued cienz cienhangh yungh daeuj hwnjguh dieg sonhag song vah saw, doengzseiz, ceng-
aeu gaep baihgwnz ngaenzcienz haeuj-coengh, bi 2016 Vanzgyangh ndaej Swcigih Gyauyuzdingh gvihaeuj daengx gih 9 aen “dieg samgak” guhyiengh song vah saw caeuq 6 aen hwnjguh dieg sonhag song vah saw, binaengz ndaej ngaenzcienz haeujcoengh 60 fanh lai maenz, bangrengz dajcauh daengx gih sonhag song vah saw, song vah saw yenzgiu, song vah saw hozdung, son-
gyauq song vah saw, song vah saw yaubwnj gocwngh haifat caeuq swnjcienz minzcuz vwnzva daengj 6 aen dieg hwnjguh moegbiu.

(Mungz Siyiz)



Sanhgyangh: Mbanjdung Faengx Hom- fwd Couxciep Ndwennghux Co'ngux

三江: 侗寨粽香迎端午

Ndwen 6 ngoenz 17, youq Sanhgyangh Duncuz Swciyen Dunczloz Myauzcuz Yangh Gauhbei Cunh, mehmbwk Duncuz cingq suok faengx. Ndwennghux co'ngux daengz lo, Liuj-couh Si Sanhgyangh Duncuz Swciyen gak cuz mehmbwk nyaengq suok faengx, dumq faengx, guhcaz, heiq faengx homfwdfwd mbin doh daengx Mbanjdung, hawj ngoenzcienz ndei conzdungj miz gij heiqsik minzsuz naek-gywdgywd. Ndaw doz dwg mehmbwk Duncuz cingq suok faengx, dumq faengx.

(Gungh Bujangh/龚普康)

Denhngoz Vut Gungz Canjnieb Hwngfat Seiqdaez Ak

天峨脱贫产业发展势头强劲

Geij bi neix daeuj, Denhngoz Yen genhciz gij hwngfat leixniemh “bya heu raemx saw couhdwg byagim bya-ngaenz”, ciuq dieg bae hwngfat, byaij diuz roen “swnghdai laeb yienh”, dawz canjnieb hwngfat dangguh diemj cengjdaemx cinjcing banggunz, diemj daengxdin ranzgungzhoj laisou baenz miz.

Ciuq cam rox, aen yienh neix doenggyaq ciu giyez yinx ngaenzcienz caeuq daezhawj cwnghwz haeujcoengh daengj fuengsik, yinx gunghshw giyez, hozcozse daengj ndawbiengz swhyenz camgya haifat banggunz canjnieb, gujli vunzlai riuzcienz diegnamh haeujgij

ginghyingz, haenqrengz gungganq mak mbouj miz goenghah, dajcauh gij mak miz daegsaek, coicaenh banggunz canjnieb daengx dieg hwngfat.

Aen yienh neix binaengz yawhsuenq caemhcai cingjhab gij ngaenzcienz gvendaengz nungzyez 10600 fanh maenz, yungh guh hwnjguh gij giekdae sezsah dieg canjnieb. Doengzseiz, anbaiz ngaenzcienz 400 fanh maenz, doiq ranzgungzhoj gag hwngfat banggunz canjnieb daezhawj ngaenzcienz boujdiep, moix ranz hawj 5000 maenz ngaenzcienz hainduj canjnieb, ranzgungzhoj ndaem dinfaex, vat gumz, bwnh daengj cwnghfuj cienzbouh bang-

cienz, doiq ranz dajndaem dajciengx lai, bouxgunhaz ciennieb hozcozse, aen giyez lingxdaez hix hawj ciengj bangcoh.

Ciuq gyoepsuenq, bineix daeuj, aen yienh neix ndaem moq hwzdauz 0.51 fanh moux, mak “sanhdwz” 1.3261 fanh moux, youzcaz 1.8 fanh moux, gajcauh sien maklaeq canjlieng daemq 0.8 fanh moux, gyalai raemxdamh swnghdai dajciengx mienhcik 0.27 fanh moux, guhsat gyalai vaiznoh ok gai 700 duz, yiengz ok gai 1000 duz, mouhom ok gai 1000 duz.

(Yaz Gveiyangh)

SIUSIK DINJ

简讯

● Seizneix, Ginhcouh Si Lingzsanh Yen 56 fanh moux maklaehcei baenz lo, ngoenznaengz baenz fanh boux bouxgunhaz nyaengq mbaet maklaehcei gai bae daengx guek gak dieg, Lingzsanh Yen dwg aen yienh Guengjsae ndaem maklaehcei cei lai, yawhsuenq bineix maklaehcei ndaej 16.5 fanh dun, beij bi'gvaq laisou 27.91%, cungj gyaqcienz mauhgvaq 10 ik maenz.

(Yiz Sienghceenz)

● Vih hawj lwgnyez engq ndei roxyiuj gij vwnzva neihanz funghouq ciet ndwenngux co'ngux, roxnyinh conzdungj vwnzva, ndwen 6 ngoenz 15, Hozciz Si singzgiu hauilai aen youwzyenz haiguh “ndwenngux co'ngux faengx homfwd” lwgnyez bohranz baenzdaug hozdung, gyoengq lwgnyez ndaej gyoengq lauxsae, bohranz sonyinx, roengzsim hag dinfwngz suok faengx, youq mwh saedguh roxnyinh gij yinxdaez conzdungj vwnzva.

(Yauz Lieng)

● Ndwen 6 ngoenz 15, Namzningz Si Roenminzcuj Siujyoz banh aen hozdung doxdax minzcuz diyzuz mizyinx “ngoenzcienz raeuz ciet ndwenngux co'ngux”. Hozdung ngoenzhaenz dawz gij fungsug daegbied gagmiz ndwenngux co'ngux yungzhaej hozdung mizyinx bae, hawj gyoengq hagseng youq mwh guhcaemz roxnyinh gij conzdungj minzsuz vwnzva.

(Ciengj Yaujmeiz)

● Ndwen 6 ngoenz 14, Cingsih Si Ginduzvej cujciiz ginduzban, gungh'anhgiz, swfhazgiz, gyauyuzgiz daengj bouhmonz bae Yinz-cangh Yangh Yinz-cangh Cuhcungh banh aen hozdung “henzguck gimqdoeg senhconz haeuj hagdangz”. Lauxsae hagseng Yinz-cangh Cuhcungh, hagseng nienzgaep sang Yinz-cangh Cungsim Siujyoz gungh 500 lai boux camgya hozdung.

(Bah Yauvwnz)